

Sikũn Pêtre **Simãw Pêtre kot Jejus kôt hkwýjê** **hwýr wam kagà nê mēnh kôt hō** **mēnh**

Simãw Pêtre na pre kagàja nhĩpêx. Jejus nhỹ hã hkrajê jahkre ho mẽ pa xwýnhjê hō na pre. Mẽ kêp Jejus kra hkêť xwýnhjaja ra kot Jejus ã hpĩr kaxyw nhũm pre kagàja nhĩpêx nê krĩ piitã hkôt Jejus kwýjê hwýr kurẽ nê kamã hprĩ hã mẽ kãm mẽmoj tã karõ. Mẽ kot arĩ Tĩrtũm kot amnhĩ nhĩpêx kôt amnhĩ nhĩpêx rãhã ho pa hã mẽ kãm karõ. Nẽ hamaxpêr o mẽ hamaxpêr rãhã ho pa hã mẽ kãm karõ.

Nẽ mẽ hkwý kot Tĩrtũm kôt amnhĩ nhĩpêx ã amnhĩ jarênh tã hkôt amnhĩ nhĩpêx kêt xwýnhjaja nhũm pre tanhmã mẽ harênh to. ã na pre mẽ kãm mẽmoj jarênh nê hã kagà nê krĩ piitã hkôt mẽ hwýr rênh anê. Nẽ mẽ kãm:

¹ Pa Kris kôt ixtõ nê ixtõxjaja. Xà mẽ amex? Ot pa mẽ awýr kagà nhĩpêx nê krĩ piitã hkôt mẽ awýr kurẽ. Ixpê Simãw Pêtre na pa wam ixte kagà nhĩpêx nê mẽ awýr mẽnh tã axte hō nhĩpêx. Ixte Jejus Kris nhỹ hã mẽ ajahkre ho ixpa xwýnh ã mẽ amã hipêx nê kumẽ. Na pa hte Jejus mã amnhĩ nhĩpêx mex o ri ixpa.

Nẽ mẽ papytãr xwýnh Jejus Krisja Tĩrtũm pyrã nê mex o mex. Nẽ wa kot amnhĩ nhĩpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tỳx rãhã ho

ri papa. Na ka htem ixpyrà nè ã amnhĩ nhĩpêx anê. Tã pa mẽ amã kagàja nhĩpêx.

² Nà Tĩrtũm mẽ mẽ panhõ Pahihti Jejus wa kot amnhĩ nhĩpêxja na ka mẽ ra harênh mar tỳx nê. Wa kot tanhmã amnhĩ nhĩpêx to nê tanhmã wa hamaxpêr toja ka mẽ mar tỳx nê wa hkôt pix mã amnhĩ nhĩpêx. Tã kêr ka mẽ arĩ ã amnhĩ nhĩpêx anhỹr rãhã ho ri apa. Jao axàmnhĩx ajamakêtkati nê akĩnh nê apa ho apa. Na pa hte ã mẽ ato Tĩrtũm mẽ Pahihti Jejus Kris wa hwỳr o ri ixpa anê. Na hte Tĩrtũm mẽ ato mex nê mẽ akutã nojarêr rãhã ho pa.

Tĩrtũm kot mẽ pahto mex o pa hã harênh

Epes 2.12-13; Wam Tesarõn 1.2-4; Sikün Pêtre

3.18

³ Nê Tĩrtũmja àhpumunh tỳx o àhpumunh tỳx jakamã na pu htem hkôt amnhĩ xunhwỳ nhũm amnhĩ tã mẽ pahpumu nê mẽ pamã àhpumunh tỳx xà hkwỳ gõ. Hãmri pu mẽ ra uràk nê amnhĩ to mex nê tãm amnhĩ nhĩpêx o ri papa. Tã kot puj mẽ nhỹrmã ma õ krĩ hwỳr api.

⁴ Na pre mẽ pakukamã amnhĩ jarênh o:

—Kot paj nhỹrmã ixkrajê mã ixte amnhĩ nhĩpêx mex kwỳ gõ nhũm mẽ inhỹ hã ho tãm ri amnhĩ nhĩpêx mex o pa. Nê ixpyrà nê hamaxpêr mex o pa.

Anhỹr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nê te ra kot mẽ pahkrãm hamaxpêr mex jagjênh nê mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anê? Nà uràk nê tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêr xwỳnhjê hkôt

amnhĩ nhĩpêx kêt nê. Nê mẽ hamaxpêr punuj o pajamaxpêr kêt nê. Nê hpãnhã mẽ pahte Tĩrtũm kôt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhỹrja na mex o mex.

⁵ Tã ã Tĩrtũm kot mẽ panhĩpêx mex anhỹr jakamã kwa kêr ka mẽ kapêr mar tỳx nê hkôt pix mã amnhĩ nhĩpêx mex o ri apa. Jao amnhĩ kaxyw hkôt ajamaxpêr rãhã nê. Kot kaj mẽ ã amã amnhĩ nhĩpêx anhỹr o apa hprãm hã kot kaj mẽ mããnên amã tãm amnhĩ nhĩpêx o apa hprãm. Nê mẽ amã Tĩrtũm kapêr piitã mar prãm o ri apa.

⁶ Hãmri nê piitã mar pa nê mẽmoj punuj piitã nê amnhĩ to htỳx nê. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nê mẽ umaj mẽ amã Kris kaga hprãm kêt nê.

Nê mẽ amã Tĩrtũm mã amnhĩ jarênh rãhã ho apa hprãm.

Nê mẽ amã kapêr mar rãhã ho apa hprãm.

⁷ Nê mẽ amã Kris kôt mẽ atõ nê mẽ atõxjê ho mex pix o ri apa hprãm. Jao te mẽ amã amnhĩ tã ma pyræk o mẽ piitã mẽ hipêx o ri mẽ hkôt apa.

⁸ E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anê nê mẽ panhõ Pahihti Jejus Kris kôt amnhĩ nhĩpêx mex o mỗ. Hãmri nhũm mẽ akwỳjaja mẽ apumu nê mẽ apê Kris kwỳ hã mẽ ajarênh kurê kumrêx.

⁹ No kot ka mẽ atõ ixkapêr mar tã hkôt amnhĩ nhĩpêx kêt nê hãmri te Tĩrtũm kot anê ate amnhĩ tomnuj rênh par mã ajamaxpêr kêt pyræk.

¹⁰⁻¹¹ No na ka htem ã amnhĩ nhĩpêx anhỹr kêt nê. Ra mẽ ate Pahihti Jejus Kris kôt amnhĩ nhĩpêx mex

jakamã na htem ja hã mẽ apumu nê Tirtũm kot mẽ ato hkra hã mẽ ajarênh kurê kumrêx. Kot kaj mẽ ã hkôt amnhĩ nhĩpêx anhÿr o apa nê mẽmo arĩgro hã apunuj nê apa htã Jejus kaga hkêt nê. Hãmri nê nhÿrmã ma Tirtũm nhõ krĩ hwÿr api nhũm mẽ apumu nê mẽ ato mex rax nê. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nê amex nê apa ho apa.

¹² Nê na ka mẽ ra Tirtũm kot amnhĩ nhĩpêx mar tÿx nê amnhĩ krã kamã kot amnhĩ nhĩpêx mã ajamaxpêr tÿx o ri apa. Tã nom kot paj arĩ mẽ amã ja jarênh rãhã ho ri iÿpa.

¹³ Kormã ixtĩr ri kot paj xatã mẽ amã harênh o amnhĩrĩt. Ja na kêt inhmã hprãm. Mẽ ate nhÿrmã tanhmã ri ajamaxpêr to nê hkaga pumaj.

¹⁴ Na pre mẽ panhõ Pahihti Jejus Krisja inhmã tokyx ixytk ã ijarê. Kot paj xep kritpêm ri ixtĩr nê iÿpa hkêt nê.

¹⁵ Jakamã na pa kormã ixtĩr ri ã mẽ amã kaga nhĩpêx anê. Mẽ ate inhmÿr pê arĩ omunh nê kamã harênh nê Tirtũm kot amnhĩ nhĩpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matêwre 17.1-5; Makre 9.1-8; Sikün Ximotre 3.16-17

¹⁶ Nê na pa pre ra tanhmã mẽ amã mẽ panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mẽ pahwÿr wrÿk ã harê. No na pa pre amnhĩ krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt iÿpa nê ixte omunh xà hkôt ã mẽ amã harênh anê.

17-18 Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wỳr api. Pa nê kaxyw Xiakre nê Juãw mẽ pa mẽ hkôt ixpimràatã hixêt ã api nê himõk ã ixkuhê. Hãmri nhũm Tĩrtũm tanhmã Jejus to nhũm hirã htỳx kãm xa. Hãmri nhũm Mễpahpãm Tĩrtũmja mẽ inhmã kapêr. Kaxkwa kamã hirã htỳx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xà hkôt pa amnhĩ xô ri mẽ amã harê nê hã kagà.

19 Na pa prem ã hixêt prêk nhĩmõk ã Jejus pumunh nê Tĩrtũm kot tanhmã harênh to hã mar anê. Hãmri nê ijamaxpêr o:

—Nà ãm hãmri na pre amnepê m Tĩrtũm nhỹ hã kapêr jarênh o mẽ pa xwỳnhjaja Jejus kukamã ã harênh anhỹr o pa. Anê.

Mễ kot tanhmã Jejus kukamã harênh toja te kot kamàt kô kamã kanê hpòk nhĩrã hkryre pyràk. Tã koja nhỹrmã akupỹn wrỳ hãmri nê te myt kator nê hirã mex nhũm mẽ pahte mẽmoj pumunh mex pyràk. Jakamã kwa kêr pu mẽ kot tanhmã Jejus kukamã harênh toja mar tỳx rãhã nhũm nhỹrmã te myt kator pyrà nê akupỹn mẽ pahwỳr wrỳ.

20 Tĩrtũm kapêr ã kagà htũm kot tanhmã ỹ hã kapêr jarênh xwỳnhjê jarênh to. Mễ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhỹr. Nom na pu htem amnhĩ krã hkôt ã mẽ ujarênh anhỹrja mar tỳx kêt nê. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nê.

21 Na pre ý hã kapêr jarênh o mẽ pa xwýnhjaja amnhĩ krã hkôt hkwýjê mã ujarênh o pa hkêt nê. Tĩrtũm Karõ na pre tanhmã mẽ hkrã hto nhũm mẽ ý hã hkwýjê mã tanhmã harênh to ho pa nê ý hã mẽ pamã hã kagà.

2

Tĩrtũm kapêr jarênh o hêx xwýnhjê jarênh

Korosê 2.16-17; Wam Ximotre 4.1-5; Sikũn Ximotre 3.1-9; Jutre 3-16

¹ Nê amnepêm na pre Ijaew kwýjaja te mẽ kêp Tĩrtũm nhỹ hã kapêr jarênh xwýnh pyrãk. Nom Tĩrtũm kapêr kwým ri hkwýjê mã tanhmã ho hêx to ho pa. Tã koja nhỹrmã mẽmojaja mẽ uràk nê mẽ awýr mra nê ã mẽ amã Tĩrtũm kapêr o hêx o pa anê. Nê kapêr kwým ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mýrapê koja Tĩrtũm tokyx mẽ kot amnhĩ xà htyx kamã hamak tũm xà hwýr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htyx ri tanhmã amnhĩ tomnuj to ho ri pa. Tã ã mẽ kot Tĩrtũm kapêr o mẽ hêx xwýnhjê mar nê mẽ hkôt amnhĩ nhĩpêx anhỹr jakamã koja mẽ kãm Tĩrtũm kapêr mar prãm xwýnhjaja mẽ kot amnhĩ nhĩpêx ã mẽ omu nê Tĩrtũm kapêrja mex kêt ã harênh japêr.

³ Tĩrtũm kapēr o mẽ hêx o mẽ pa xwỳnhjaja na htem kàxpore pix prãm xàj mẽ awỳr mra nẽ tanhmã mẽ amã kapēr jarēnh o hêx to ho pa nhũm Tĩrtũm ja hã mẽ omunh rãhã ho hkrĩ. Na hte nhỹhỹm mrar kêt nẽ rỳ htỳx õt o hikwỳ hkêt nẽ. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhỹrmã ma mẽ kot amnhĩ xà htỳx kamã hamak tũm xàta hwỳr mẽ kurẽ nhũm mẽ ma hwỳr hapêx pa.

⁴ Nẽ amnepê mã kaxkwa kamã Tĩrtũm kapēr o mẽ wrỳk xwỳnh kwỳjaja na prem axtem nẽ Tĩrtũm kapēr nhĩrôp kuhê nhũm tee ri amnhĩ tã mẽ omu hãmri nẽ amnhĩ nẽ mẽ kator pa. Mẽ kamã ukaprĩ hkêt nẽ amnhĩ nẽ mẽ kator pa hãmri nẽ mẽ kot amnhĩ xà htỳx kamã hamak tũm xàta wỳr mẽ hano. Nhũm prem ma hwỳr pa nẽ ahkre xupỳm kãm kamàt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harēnh to xà hã arĩgroja jamār o hkrĩ. Nẽ tee ri kãm hapôx prãm kaprỳ ho hkrĩ.

⁵ Nẽ amnepêm pika kamã ri mẽ pa xwỳnhjaja na prem haxwỳja piitã amnhĩ tomnuj pix o ri pa. Jakamã nhũm Tĩrtũm ja hã mẽ omu nẽ mẽ kamã ukaprĩ hkêt nẽ. Nẽ mẽ hwỳr na rax mẽ. Mẽ kãm kapēr mar prãm kêt jakamã nhũm mẽ hwỳr kumẽ nhũm wrỳk rax kumrêx nẽ mẽ hanhir pa nẽ mẽ himex. ãm Noehti mẽ hkwỳ pê 7 pixjaja nhũm mẽ kurom htĩr nẽ hkà hkĩnh nẽ mex nẽ pa. Noehti kormã na xwỳj ri kot mẽ kãm Tĩrtũm kapēr jarēnh o ri mẽ hkôt pa htã nhũm mẽ kuma nẽ ãm kuma. Mỳrapê na prem piitã pikaprār pa.

⁶ Nẽ Sotõ mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tĩrtũm wantajê pyrã nẽ mẽ kamã ukaprĩ

hkêt nê. Na pre kaxkwa rūm mẽ hipy mẽmo hpôk kwỳ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tĩrtũm mẽ kot amnhĩ tomnuj xwỳnhjê nhĩpêx anê.

Anhỹr o hamaxpêr kaxyw na pre ã mẽ hipêx anê.

⁷⁻⁸ Nom Rohtija na pre Tĩrtũm Sotō nê kator jakamã nhũm htyk kêt nê. Na pre hkwỳjê rom tãm amnhĩ nhĩpêx tã mẽ kot amnhĩ tomnuj tỳx xwỳnhjê nhõ krĩ kamã òrkwỹ nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ỹ hã hkaprĩ nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprĩ htỳx nê pa.

⁹ Tã nhũm Tĩrtũm mẽ himex kaxyw nê mẽ nê kator nê mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ nhĩpêx xwỳnhjê pytâr anê. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htỳx kamã hamak tũm xà wỳr mẽ rênh pa. ãm tapxipix kot ã mẽ hipêx anhỹr kaxyw ãhpumunh tỳx.

¹⁰ Tã mẽ hpijaàm kêt kãm amnhĩ tomnuj o mẽ pa xwỳnhjaja nê mẽ kot Tĩrtũm kapêr mar nê ãm mar xwỳnhjaja koja nhỹrmã mẽ homnuj tỳx nê.

Nê Tĩrtũm kapêr o hêx o ri mẽ pa xwỳnhjaja na htem amnhĩ to jarkrar pix o pa. Nê Tĩrtũm kapêr o mẽ wrỳk xwỳnhjê hã hpijaàm kêt nê. Nê axtem

nê mẽ ho kapêr punuj pê tanhmã mẽ haprỳ hto ho pa.

11 Tã nhũm htem amnhĩ tã mẽ kuma nê ãm mẽ kuma. Mẽ kurom mẽ hihtỳx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nê.

12 Nê mry xoprê na hte htỳx ri pa ho pa. Tã Tĩrtũm kapêr o mẽ hêx o mẽ pa xwỳnhjaja htem mry xoprêta pyrã nê htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nê mry xoprêja htỳx pa nhũm mẽ kot hparja pyrã nê mẽ kot Tĩrtũm kapêr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nê kamã mẽ rênh pa.

13 Nê koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ hom-nuj tỳx nê. Na htem hpijaàm kêt nê mẽ piitã mẽ noo mã tanhmã amnhĩ tomnuj to ho pa. Kamàt kãm nê arĩgro hã. Nê mẽ kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mẽ kêp Kris kôt mẽ atõjê pyrã nê mẽ akôt Tĩrtũm kapêr mar xà hã ixkre hwỳr agiê nê mẽ anhĩhkô hã mẽ kot Jejus tyk mã hamaxpêr kaxyw pãwti hkwy hku. Nom htỳx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htỳx ri hkur o hkrĩ.

14 Nê nhỹri krĩ hwỳr pøj nê mênijê pumu nê kãm mẽ hkĩnh nê. Ra mẽ mjên ri pa htã nhũm mẽ kãm mẽ ho amnhĩkati hprãm nê mẽ kamã hpijaàm kêt o ri pa.

Ně kormã mẽ kot Kris kôt amnhĩ xunhwỳr tohtuj anhỹr xwỳnhjê hwỳr mra nẽ hêx rom tanhmã mẽ kãm kapêr to pê mẽ no kupyw o ri mẽ hkôt pa. Mẽ kot mẽ mar nẽ Kris kaga nẽ mẽ hkôt ri amnhĩ nhĩpêx prãm xà ã mẽ hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho õxỳ nẽ.

Ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj tỳx kaxyw mẽ hã amnhĩ jarẽ.

¹⁵⁻¹⁶ Te mẽ kot kamàt kô kamã pry juk ã hpikunor nẽ htỳx ri pa pyràk o na htem amnhĩ nhĩpêx nẽ kãm Tĩrtũm kapêr mar prãm kêt nẽ amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nẽ kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nẽ Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nẽ tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nẽ ã amnhĩ nhĩpêx anhỹr kêt nẽ. Tã mẽ kot Tĩrtũm kapêr o mẽ hêx ho mẽ pa xwỳnhjaja na htem Paraãw pyrã nẽ kàxpore rax prãm xàj tanhmã amnhĩ tomnuj to pix prãm.

¹⁷ Te hino ra grà nhũm mẽ tee ri kamã gô japêr pyràk o na htem amnhĩ nhĩpêx. Rỳ te kakrà hapôx nhũm mẽ kot omunh nẽ na wrỳk ã hkamnhĩx kaprỳ pyràk. Tã ra Tĩrtũm mẽ kaxyw kamàt kô htỳx pê mẽ kot amnhĩ xà htỳx kamã hamak tũm xàta o mẽ nê.

18 Na htem htÿx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mẽhõ ra amnhĩ tomnuj kaga kaxyw nhũm mẽ tee ri ja hã omu nẽ kot ã amnhĩ nhĩpêx anhÿr pymaj tanhmã nẽ kãm kapêr to nẽ mẽ kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nẽ ãm ixpumu nẽ arĩ inhmex ã ijarẽ. Na pa hte mẽ hkuprÿjê hwÿr mra nhũm ja hã ixpumu nẽ ãm ixpumu nẽ hã tanhmã ixto hkêt nẽ. Jakamã kwa mẽ ixpyrà nẽ arĩ ã amnhĩ nhĩpêx anhÿr o ri apa. Koja Tĩrtũm tanhmã hã ato hkêt nẽ. Anẽ.

Hãmri nhũm mẽ tee ri kuma nẽ ra hamaxpêr kati nẽ.

19 Na htem mẽ kãm kapêr o:

—Kwa mẽ ixpyrà nẽ mãmrĩ amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mẽhõ kot kêt ja nẽ tanhmã amã kapêr to? Anẽ.

Mẽ kot amnhĩ tomnuj xàja te kêp mẽ õ patrãw pyræk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nẽ axte. Nẽ gaa nẽ ra ho amnhĩ pyræk. Hãmri nẽ tee ri pamã hkaga hprãm kaprÿ nhũm te kêp mẽ panhõ patrãw pyræk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

20 Nẽ koja mẽhõ ra Tĩrtũm kapêr ma. Nẽ mẽ panhõ Pahihti Jesus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytâr xwÿnh ã harênh ma. Tã nhũm mẽ kot Tĩrtũm kapêr o mẽ hêx xwÿnhjaja hwÿr mra nẽ tanhmã kãm ho hêx to nhũm mẽ kuma nẽ kot amnhĩ nhĩpêx tũm o

awjanã. Jao amnhĩ tomnuj tỳx o kormã kot Tĩrtũm kapẽr mar kêt ri kot amnhĩ tomnujta jakre.

²¹ Kêp ãm aa kot Tĩrtũm kapẽr mar kêt rãhã htyk ronhỹx ja kãm mex nẽ. Nom ra kot mar mex tã ãm kuma nẽ hkaga jakamã koja mex kêt kumrẽx.

²² Mẽ kot ã mẽ kot amnhĩ nhĩpêx anhỹr ã mẽ harẽnh kot:

Rop na hte ôjaĩr nẽ akupỹm ôjaĩrta ku.

Nẽ hagrô na htem unê nẽ hkumrã nhũm muxre.

Tã nhũm mẽ kãm ure nhũm akupỹm hprôt nẽ mra nẽ akupỹm gyw o amnhĩ tomnu pa.

Anẽ.

Tã mẽ kot Tĩrtũm kapẽr o mẽ hêx xwỳnhjê mar nẽ mẽ hkôt amnhĩ nhĩpêx xwỳnhjaja te mẽ kot rop mẽ hagrô wa kot amnhĩ nhĩpêxta pyrã nẽ Tĩrtũm kapẽr kaga nẽ akupỹm mẽ kot amnhĩ nhĩpêx tũm o awjanã nẽ htỳx ri amnhĩ nhĩpêx o pa.

3

Tĩrtũm kot pika ho hapêx kaxyw kormã amnhĩ tã mẽ pajamãr ã harẽnh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwỳjaja. Na pa pre ra wam kagãta nhĩpêx nẽ mẽ awỳr kurẽ. Tã ra axte hkôt ja nhĩpêx. Hamẽ wa kamã na pa mẽ amã Tĩrtũm kot tanhmã amnhĩ nhĩpêx to hã harẽ. Nẽ Jejus Kris nhỹrmã akupỹn mẽ pahwỳr wrỳk ã harẽ. Mẽ ate mar nẽ tãm amnhĩ nhĩpêx nẽ tãm ajamaxpẽr o kutêp mẽ apa kaxyw.

² Amnepê mã Tĩrtũm nhỹ hã kapẽr jarẽnh o ri mẽ pa xwỳnhjaja na prem Tĩrtũm kot nhỹrmã mẽ pahwỳr mẽhõ mẽnã mã xwỳnhta jarẽnh o pa. Kot

nhỹrmã mẽ pahwỳr wrỳk nẽ mẽ pahto amnhĩptàr o pa hã harẽnh o pa. Tã kêr ka mẽ kapêr ma nẽ hã ano htỳx nẽ hkôt ajamaxpêr tỳx rãhã ho ri apa. Nẽ Jesus kot mẽ awỳr mẽ rẽnh xwỳnhjaja ka mẽ kapêr ma. Mẽ kot mẽ amã mẽmoj jarẽnh o mẽ pa xwỳnhjaja na htem tanhmã mẽ amã Pahihti Kris jarẽnh to ho ri mẽ akôt pa. Nẽ tanhmã kot mẽ panê amnhĩ nhĩpêx to hã harẽ. Tã kêr ka mẽ kapêr ma nẽ hã ano htỳx nẽ kãm ajamaxpêr tỳx rãhã ho ri apa.

³ Nẽ kwa mẽ inhma. Nhỹrmã Kris akupỳn mẽ pahwỳr wrỳk xwỳj ri koja mẽ kot amnhĩ tomnuj tỳx xwỳnhjaja mẽ awỳr mra. Mẽ hpijaàm kêt o pa xwỳnh jakamã koja mẽ tanhmã mẽ akamã amnhĩ tomnuj to ho pa. Nẽ mẽ apê Kris kwỳ hã mẽ apumu nẽ mẽ atã hpêr o pikênh o pa.

⁴ Nẽ htỳx ri Kris ã mẽ akukja nẽ mẽ amã:

—Kwa no Krisja? Amnepêm akupỳn wrỳk nẽ mẽmoj piitã tanhmã hipêx to hã amnhĩ jarẽnh tã arĩ Tĩrtũm kot mẽmoj to kator krax rũm mẽmoj amarĩ rãhãã. Ra mẽ panhĩgêjtjaja pikaprãr par tã nhũm kormã akupỳn wrỳk kêt nẽ. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anẽ.

⁵⁻⁶ Nom ã mẽ kot harẽnh anhỹrja kot anhỹr kêt. Tĩrtũm kot mẽmoj to kator krax rũm mẽmoj amarĩ rãhã hã mẽ kot harẽnhja kot anhỹr kêt. Na pre Tĩrtũm kapêr pix o kaxkwa nẽ pika ho kato. Nhũm gô hkwỳja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nẽ mẽ kot amnhĩ tomnuj tỳx mỳrapê na pre Tĩrtũm gô ho mẽ himex pa. Jao mẽ hwỳr na rax mẽ nhũm mẽ hanhir o

mê ho hapêx. No nhùm mê kot Jejus wrÿk ã hpêr o pikênh xwÿnhtaja kãm ã mê harênh anhÿrja mar prãm kêt. Ra mê kot mar tâ kãm mar prãm kêt nê arÿ mêmoj piitã rãhã hã ri harênh o pa.

⁷ Pika nê kaxkwaja arÿ rãhã htã koja Tÿrtùm nhÿrmã mê pahpiitã mê pahte tanhmã amnhÿ nhÿpêx to hã mê pahpumunh kôt tanhmã mê pajarênh to. Nê mê kot amnhÿ xà htÿx kamã hamak tùm xà hwÿr mê kot amnhÿ tomnuj xwÿnhjê rênh pa. Hãmri nhùm rÿ kormã kaxkwa nê pikaja wa pôr nhùm himôk ã mêmoj piitã hkaxàr pa nê hapêx.

⁸ Nê amgrà pê 1.000ja mê pamã amgrà xohtô rax kumrêx no Tÿrtùm mã te arÿgro pixire pyræk.

⁹ Tã ra kot mê pamã tokyx Jejus akupÿn wrÿk ã harênh tâ nhùm kormã wrÿk kêt jakamã nhùm htem tõhã tee ri hamãr o pa nê hamaxpêr o:

—Hêxta waa nê. Tÿrtùm kot tokyx akupÿn mê pahwÿr Jejus mênh ã amnhÿ jarênh tâ tokyx mênh kêt nê.

Anhÿr o harênh tâ no ãm kot anhÿr kêt. Na kormã amnhÿ tâ mê kot amnhÿ tomnuj xwÿnhjê jamãr o pa. Mê kot amnhÿ tomnuj kaga nê hkôt amnhÿ xunhwÿr prãm xàj kormã amnhÿ tâ mê hamã. Kãm mê kot amnhÿ xà htÿx kamã hamak tùm xàta wÿr mênhõ ho pixire nê môr prãm kêt jakamã na kormã amnhÿ tâ mê hamã.

¹⁰ Tã koja nhÿrmã mê panhõ Pahihtija akupÿn mê pahwÿr wrÿ. Te mê àhkÿnh xwÿnh kot amnhÿ nhÿpêx pyræk o mê pajaêr pê akupÿn wrÿ. Pu mê pahtÿx ri tanhmã paxàpênh to ho ri papa nê akupÿn wrÿk ã hkamnhÿx kêt rãhã nhùm mê pajaêr pê akupÿn wrÿ. Hãmri nê ma akupÿm amnhÿ kôt mê pahte hkôt amnhÿ xunhwÿr xwÿnhjê ho àpir

par kurê kumrêx. Hãmri nhũm rĩ kormã kaxkwa kaxàr o hkrihkrit tỳx kãm hapêx pa. Nê kanhêti mẽ myt nê mytwrỳre kaxàr pa. Nê pikaja nê mãânên kamã mẽmoj piitã kaxàr pa.

11-12 Koja nhỹrmã ã mẽmoj hapêx par anê. Jakamã kwa kêr pu mẽ Jejus kutêp tãm ri amnhĩ nhĩpêx rãhã ho ri papa. Nê Tĩrtũm kapêr kôt pix mã amnhĩ nhĩpêx rãhã nê. Nê kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jejus akupỹn wrỳ nê ã mẽ pahte amnhĩ nhĩpêx anhỹr ã mẽ pahpumu. Koja wrỳ nhũm rĩ kormã kaxkwa nê pikaja wa kaxàr pa. Nhũm kuwy mỳri kaxkwa kamã mẽmoj harir xwýnhja xêr nê ôr pa nê hapêx.

13 Tã kwãr mãmrĩ mẽmoj ã amnhĩ nhĩpêx anê. Koja Tĩrtũm axte mẽmoj mex nhĩpêx. Na pre amnhĩ kukamã ja jarênh o:

Kot paj axte pika nê kaxkwa hõ nhĩpêx nhũm mex o mex. Nhũm mẽ kot amnhĩ kaxyw Jejus mã hamaxpêr nê hkôt amnhĩ xunhwỳr nhũm ixte mẽ mex ã mẽ harênh xwýnh pixjaja koja mẽ pika nywja kamã mex nê pa ho pa. Anê.

14 Jakamã kwa ixkrãmnhwỳjaja. Kêr ka mẽ Kris kutêp kapêr kôt amnhĩ nhĩpêx mex rãhã ho ri apa. Jao kutêp ajamakêtkati nê axãmnhĩx axpên kôt apa. Kêr ka mẽ nhỹrmã amnhĩ wỳr omu nê tee ri amnhĩ kukamã ajamaxpêr kêt nê. Ate tãm amnhĩ nhĩpêx o apa hã amnhĩ pumu nê akĩnh nê amnhĩ wỳr omunh o akuhê.

15 Nom arĩ Jejus kãm mẽ pahkwỳjê ho hkra hprãm jakamã na kormã amnhĩ tã mẽ hamã nê tokyx akupỹn wrỳk kêt nê. Na pre Jejus kôt mẽ

pahtõ Pawre Tirtũm nhỹ hã ã mẽ pamã ja hã kagà anẽ. Pawreja ixkràmnhwỳ mex na.

¹⁶ Na hte mẽ pakaxyw kagà nhĩpêx nẽ kamã mẽ pahte Jejus kutêp tãm amnhĩ nhĩpêx o papa hã mẽ pamã karõ. Na hte tõhã mẽmoj tã kagà pu mẽ kamã harẽ nẽ tee ri pahprĩ hã mar mã no ãm mar mex kêt nẽ. Hãmri nhũm Tirtũm kapêr o mẽ hêx o mẽ pa xwỳnhtaja haxwỳja kuma hãmri nẽ amnhĩ krã hkôt hijuk ri tanhmã ho hêx to. Te mẽ kot hprĩ hã mar nẽ harẽnh pyrak nom hprĩ hã mar kêt nẽ. ã na htem Tirtũm kapêr ã kagà piitã ho hêx o pa anẽ. Mỳrapê koja mẽ nhỹrmã amnhĩ xà kamã hamak tỳx kumrêx.

¹⁷ Tã e Kris kôt ixkràmnhwỳjaja. Ra mẽ ate mẽ harẽnh mar jakamã kwa mẽ okora. Mẽ amnhĩ nẽ mẽ omunh mex nẽ mẽ hkôt amnhĩ nhĩpêx kêt nẽ. Kot kaj mẽ anẽ nẽ Tirtũm kôt amnhĩ nhĩpêx mex kêt nẽ.

¹⁸ Na ka htem mẽ papytâr xwỳnh Pahiht Jejus Kris kôt ri amnhĩ nhĩpêx o apa. Tã kêr ka mẽ arĩ hkôt amnhĩ nhĩpêx mex rãhã ho ri apa. Nẽ hkôt amnhĩ xunhwỳr tỳx nẽ. Kêr kê amnhĩ tã mẽ apumu nẽ mẽmoj to mẽ akutã nojarêt nẽ. Krisja mex o mex nẽ hihtỳx o hihtỳx. Tã kêr pu mẽ kãm mex o mex ã mãn harẽnh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagà nẽ mẽ awỳr mẽnh anẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f